

39000/12 73775
Q. D. B. V.
DISSERTATIO MEDICA INAUGURALIS
DE
HÆMORRHAGIA
UTERI

QUAM
CONSENTIENTE
GRATIOSA FACULTATE MEDICA
ARGENTORATENSI
PRO LICENTIA

SUMMOS IN MEDICINA HONORES
ET

PRIVILEGIA DOCTORALIA

RITE OBTINENDI


SOLENNI MEDICORUM EXAMINI
SUBJICIT

PETRUS JOSEPHUS OBERLIN

HAGENOENSIS

AD DIEM XXXI. JANUARIJ A. O. R. MDCCLXVII.

H. L. Q. C.



ARGENTORATI

Typis JOH. HENR. HEITZII, Universitatis Typographi.

DEO
PATRIÆ
PARENTIBUS
PATRONIS
ATQUE
AMICIS.



§. I.



Bi sanguis ex aliqua corporis humani parte præter naturam *a)* profluit, *Hæmorrhagia* *b)* adesse dicitur, quæ quidem vox, quanquam illa quandoque levia solummodo stillicidia *c)*, quale illud est quod a naribus fit & sæpissime absque noxa est, indigitare solemus, proprie tamen vi derivationis *d)* non nisi impetuosum & jugem fluxum, qui proinde etiam cum periculo fit, denotat.

a) Nam qui naturalis est fluxus, cujus unicum exemplum in catameniis habetur, nunquam hoc nomine insignitur, uti nec ille, qui ex Medentis consilio fit, ubi arte aut vena aut arteria secatur, debitoque tempore iterum clauditur.

b) Licet sæpius a loco aut modo quo profluit, aliud nomen sortitur, uti hæmoptysis, hæmorrhoides, &c.

c) Modicus talis sanguinis fluxus DIOSCORIDI αἰμόρροια, a ῥέω fluo, dicitur, HIPPOCRATI vero ἔρρυσις, effluxus, s. σαλαγμός, stillicidium; quamvis & sanguinem leniter e naribus manantem sæpissime hæmorrhagiam simpliciter vocare soleat.

d) Deducitur enim a ῥαγῆναι, quod HIPPOCRATI cum impetu & confertim prodire significat, interpretante GALENO ἐν ταῖς γλῶσσαις, cf. GORRÆI *Defin. Medicæ* p. 16. *b.* § p. 548. *a.* HENR. STEPHANUS tamen in *Thesaur. Græc. Ling.* Tom. I. p. 156. "ab activa voce commodius deduci existimat, & quidem eam in usu

notata passim significatione accipiendo; ut αἱμορραγῆν sit idem ac αἷμα ῥαγῆν, pro αἷμα ῥήξαι; " id est, sanguinem rumpere, nota Græcorum loquendi ratione.

§. II.

Hæmorrhagia oriri nequit, nisi soluta continentis vasis continuitate. Triplici hoc fieri posse modo, vulgo in scholis docemur. Ανατομώσει, qua orificia vasorum præter modum ampliantur, ut quem coërcere debebant liquorem elabi finant, id quod vel a nimia debilitati orificii relaxatione, vel urgentis a tergo humoris copia & impetu usu venire solet. Διαπυρρύνσει, quando juncta glutine & intertextæ canalis fibræ ita a se invicem secedunt, ut fluidum per ipsa canalis latera exsudet, id quod accidit, ubi orificium quod transmittere sanguinem debebat, quacunque de causa ita arctatur atque stringitur, ut actus ad exteriora vi cordis & arteriarum sanguis, objectam sibi moram vincere impos accumuletur, quo tandem debilitatæ laterum vasis fibræ secedere a se invicem coguntur. Διαρρηξίσει tandem oritur, quando vel admota vi externa, vel ipsa interna sanguinis vi fibræ plane rumpuntur, ut elementa fibræ constituentia quodam in loco a se invicem separentur, & qua data porta sanguis libere effluat. Cujus species Διαρροή, si acrimonia sanguinis fibræ exceduntur, dicitur.

§. III.

Hæmorrhagiæ licet ubique locorum ubi sanguinea vasa præsto sunt, oriri possint, maximeque in illis partibus quæ vasis abundant & tenuioris structuræ sunt, quales sunt choroidei plexus, membrana pituitaria, pulmones, &c. nullibi tamen frequentiores, ob causarum insignem varietatem, visceris ipsius structuram & multis externis injuriis expositionem occurrit, quam in utero, quippe qui
laxus,

laxus, spongiosus, tota fere substantia vasculosus, magno sanguinis volumini recipiendo accommodatior est: quo & præter alias causas illud accedit, quod nullus in humano corpore locus sit, in quo partes contentæ minus premantur, quam pelvis feminae, atque hinc omnis sanguinis quantitate excessus deorsum determinetur, notante BOERHAAVIO a).

a) *Prælect. Acad. ad propr. Inst. T. V. P. II. pag. 5. & 53. ed. Gœtting. 1744. 8vo.*

§. IV.

Quamdiu autem femininum corpus adhuc increfcit, adeoque ad nutritionem & augmentum omnium suarum partium sanguine indiget, ipse sanguis non accumulabitur, neque adeo in debiliore aliquo loco exitum quærere necesse habebit. Utprimum vero versus perfectionis suæ terminum pervenit, quod circa decimum & quintum ætatis annum contingere solet, ruit ad minus resistentia uterina vasa superfluous a) sanguis, dilatationem in ipsis sive *ὑπέρμα*, quod semper *ἀνατομῶσιν* vasorum præcedit, causabitur, ipsoque tandem luminum renixu superato, profluit, vera *ἀνατομῶσει*, non vero quod FREINDIO b) placet, *διαρροῇ*.

a) Quæ enim contra menstruorum theoriam, quam a plethora deducunt scholæ, allata sunt ab aliis dubia, non sufficere ad illam convellendam videntur. Placeret sententia ASTRUCII, dummodo eam Anatome magis confirmaret. Ceterum ejus conjectura, quam habet, *Traité sur les Maladies des Femmes* L. I. Chap. II. §. VI. menstruam purgationis sanguineæ periodum non a prima origine & ex naturæ instituto contingere, sed ortum suum molliori vitæ rationi debere, non inconcinna mihi videtur, præcipue si cum eis comparentur, quæ de degeneratione & varietatibus hominum & animalium, inprimis a statu domestico & longa a prima stirpe distantia oriundis egregie passim differit BUFFON, *Hist. Nat. Univers.*

b) *Emmenolog. pag. 76.*

§. V.

Fluxus hic statis menstruis periodis rediens summe necessarius sequiori sexui est, & si rite procedat maximo-
pere salutaris. Accidit vero quam sæpissime, ut multis
modis negotium istud turbetur, dum vel debito tempore
evacuatio non prodit, vel nimis parca quantitate, vel &
nimia, qui ultimus demum affectus proprie *hæmorrhagia
uteri* vel *immodicus mensium fluxus*, aut *profluvium
mensium* a) aut *Menorrhagia* b) dicitur. c)

a) MAGIRE *Patholog.* L. II. S. 4. c. 32. GORTER *Comp. Med.*

b) SAUVAGES *Nosol. Meth.* Class. IX. Gen. VI. Spec. 3. 6. 8. de
quibus solis hic agimus.

c) Compendii gratia quemcunque sanguinis ex utero nimium fluxum
uno titulo efferro, licet haud inutile sit, uti quidem Cel. ASTRUC
fecit. *Malad. des Femmes* T. II. L. I. Ch. IX. §. 1. inter *mensēs
immoderatos*, qui aliquam periodum servant, & inter *sanguinis
profluvium copiosius* (*perte de sang,*) & *Stillicidium parcius*
(*Suintement*) distinguere, & a copia, duratione, frequentia,
totidem diversos gradus morbi constituere. De hæmorrhagia uteri
vesiculari cf. MAURIT. HOFFMANN in *E. N. C.* Cent. IV. Obs. CXL.

§. VI.

Neque tamen protinus omnis menstruatio, quæ no-
bis immodica videtur, morbosa pronuncianda est: rursus
aliæ profluvium modicum, quod aliis maxime naturale
est, minus ferunt. Dandum est aliquid climati & cœli
ingenio, nam non ubique æqualiter purgantur, sed quo
magis regiones ad æquatorem accedunt, eo magis ple-
rumque ob clementiorem aërem rarefacta incolarum cor-
pora fluxum hunc patiuntur. Nam HIPPOCRATES a) græ-
carum feminarum menses duabus heminis sive viginti un-
ciis æquat: Hispanarum quatuordecim aut sedecim unciis
FITZGERALD b), Occitanarum unciis octo ad decem IDEM c)
unciis octo ad sedecim ASTRUC cc), unciis duodecim SAU-
VAGES d), Batavarum unciis sedecim in corporibus mol-
libus,

libus, at in strictis ne quidem quinque GORTER *e)*, Anglarum testæ ovi anserini capacitæ SYDENHAM *f)*, unde miror FREINDIUM *g)* ad usque libram & duas tertias illorum pondus determinare. Viennensium puellarum menstrua ab unciiis tribus ad decem æstimat DE HAEN. *h)* Groenlandis feminis plane nullos esse menses ferunt. *i)* Sic & Lappones multæ nunquam menstruum fluxum experiuntur, aliæ æstate tantum. *k)* Post hæc vitæ quoque genus & ipse corporis habitus multum in hoc negotio discriminis faciunt, nam quæ aut laute aut otiosæ vivunt, quæ laxæ structuræ sunt, aut igne admoto pedes fovendo sanguinem versus inferiora trahunt, multo copiosioræ præ laboriosis, exercitatis, strictis, tenuiter viventibus, fluxum experiuntur.

- a)* *Dei yvaxciav* L. I. Sect. 15.
- b)* in *Differt. de Catameniis*. Monspel.
- c)* ibidem, & LIEUTAUD *Synops. univ. Prax. med.* I. p. 448.
- cc)* *Malad. des Femmes* T. I. Edit. Aven. 1763. pag. 18.
- d)* *Nosolog. Meth.* Class. IX. G. VI. Sp. 3.
- e)* *Syst. prax. Med.* T. II. *morb. partic.* p. 164.
- f)* *Process. integr. in cur. morb. in Oper.* p. 502.
- g)* *Emmenol.* p. 83.
- h)* *Rat. Med.* P. IV. Cap. VI. p. 204.
- i)* PECHLIN *Obs. Phys. Med.* L. I. Obs. 34.
- k)* LINN. *Flor Lapp.* p. 324.

§. VII.

Ergo qui Medici auxilium requirit catameniorum fluxus, actionibus quibusdam læsis cognoscitur, si enim bene ferat etiam uberiores fluxum muliebri corpus, morbosus non censendus est. Præter horrorem, dolores lumborum tensivos, & sensum ponderis inducentes, languorem corporis & cephalalgiam, quæ moderato etiam fluxui sæpius adesse solent, observatur color corporis vitiatus, cadaverosus, cachexia, appetitus prostratus, sitis, imbecillitas,

tas, somnus turbatus, vasorum subsidentia cum pulsu celeri, ardores febriles interni, extremitatum refrigeratio, urina pallida, alvus obstructa, dyspnœa, syncope, convulsio, pedum œdema, quod tandem in ipsam intercutem aquam terminatur, aut in fluorem album, hæcticam, atrophiam abit, quorum symptomatum plurima non laxitatem modo & debilitatem uteri, sed spasmodicas quoque strictureas nervearum & vasculosarum partium adesse ostendunt, unde simul patet ratio, cur sensibiliores feminae & quæ tenerioris structuræ sunt, hypochondriacæ & hystericae, magis huic affectui quam aliæ obnoxia sint. Ipse sanguis a) qui effluit non semper idem, mox enim sincerus exit atque floridus, mox autem, ubi nempe diutius moramnectere coactus fuit, quod sæpe ad aliquot mensium spatium extenditur, luridus, coagulatus atque grumofus, sub finem morbi lentus & glutinosus, sæpe etiam valde dilutus, serofus, quando simul aliis excretionibus, urinæ, sudoris imminutis, liquores qui per alias vias expelli debebant, huc determinantur.

- a) Sanguis menstruus an ex utero an vagina veniat, hujus loci non est disquirere. Ipsum venosum esse ii tantum concedere posse videntur, qui cum Astrucio catamenia ex appendicibus cœcis venosis uteri derivant.

§. VIII.

Proxima hujus affectus causa, prouti ipsorum mensium regularium in *αναστομώσεις* sed nimis aucta quærenda est. Quæ iterum vel nimiaë orificiorum laxitati, vel plethoræ commotæ, vel utrisque, vel nimiaë sanguinis dissolutioni & tenuitati, vel obstructioni hepatis, lienis, aut mesenterii, in quo casu necessario plus sanguinis ad uterum deferri oportet, suam debet originem. Remotiores autem & occasionales causæ sunt omnia illa, quæ aut nimiam sanguini-

sanguinis copiam generare, aut cruorem attenuare, aut in motum ciere, aut obstruere abdominalia viscera, aut vasorum uterinorum ostia debilitare valent. Hinc valde calens aër, otiosa vita, motus vehemens in insueta, aut validus nisus, a) sternutatio, b) cächinnus & vomitus valentiores, cibus probe nutriens, potus calefaciens, venis exercitium nimium, animi pathemata fortiora, emmenagoga & pessaria c) acria, stimulantia, aliæ evacuationes suppressæ malum hoc plethoram vel causando vel commovendo producant. Debilitas vero orificiorum, quibus arteriæ in uterum hiant, vel in ipsa laxa structura, vel in præcedente laborioso aut frequenti partu, post quem uterus se non satis constrinxit, nec ad naturale robur iterum pervenit, vel in sanguinis vi, qui nimis diu urgendo elatèrem vasorum infringit, causam suam invenire potest, quæ ratio est, cur sæpius illæ puellæ, quæ diutius suppressionem catameniorum passæ sunt, tandem ubi sanguis claustra rupit, hæmorrhagiam talem nimiam experiantur, præsertim quando incaute menstrua apud puellas nobiles sollicitando, balneis frequentibus uterina vasa debilitant, ut dein nimia copia & singulis fere septimanis redeant. d) Idem & illis feminis usu venit, quæ circa septimum ætatis annorum septenarium constitutæ, quo parere ut plurimum cessant, inhibita per aliquot menses evacuatione ultima vice large satis menstruantur, nec posthæc unquam fluxui huic obnoxie sunt: id quod tamen quandoque cum magno periculo fit, præcipue si in plethoricis subjectis & boni habitus neglectis venæsectionibus, circa sexagesimum annum subito & inexpectato redit, ubi vix arte compescenda sanguinis fluentia fatalem tandem hecticam & convulsionem amisso fere omni vitali liquore inducunt. e)

a) Tale exemplum habet FORESTUS L. 28. Obs. 16.

b) HILDANUS Cent. 3. Obs. 58.

c) VARAN.

c) VARANDÆUS de *Morbis Mulierum*.

d) VAN SWIETEN *Comm. Tom. IV. p. 429.*

e) BROOKES *General practice of Physic Vol. II. p. 107. ed. 4ta.*

§. IX.

Fiunt vero & alia sanguinis ab utero profluvia, quæ non sponte sua, sed ab externis causis producuntur, variorumque diæresin pro sua proxima causa agnoscunt. Nam postquam utero foetum excussit mater, sequi debet annexa infanti umbilicalis funiculi ope placenta, quæ cum utero firmiter vasis suis hæreat, solvi inde nisi ruptis vasis nequaquam potest, hinc sanguinis post partum fluxus, quem Lochia vocant. Hæc nimia sæpius & magna cum virium jactura atque periculo contingunt. Eaque res eo magis periculosa plena est aleæ, si heterogenea post partum in utero remanserunt, quæ aut uterum irritando, aut æqualiter contrahi impediendo fluxum sisti non permittunt. Itaque si aut tota placenta ab uteri superficie soluta quidem, sed in ejus cavo remanens, aut portio saltem illius intus hæserit, aut congrumatus sanguis, aut caput aliave pars infantis, quem per partes eximi necessum fuit, aut integer alter infans, soluta jam prioris ex obstetricantis errore placenta, aut mola præfens fuerit, hæmorrhagiam talem oriri oportet. Simile periculum minatur, si prævia in partu placenta est, si avulsa ante partum ob funiculum aut nimis brevem aut circum infantis collum flexum, si majus aliquod vas ruptum fuerit, si vulneratus funiculus, a) si manus obstetricantis ruditer uterum tractaverit & vellicaverit, si ipse uterus ruptus sit, si femina abortum vel mala fortuna passa sit, vel nefandis artibus *militia digna perire sua* b) provocaverit, quem plerumque hæmorrhagia præcedit eo periculosior, est, quo propior femina naturali partus tempori est. c) Accidit etiam quandoque, ut si feminæ lochia non suffi-

sufficienter fluxerint, post aliquot menses magna oriatur hæmorrhagia, animi deliquiis stipata, non cessans donec congrumatus sanguis molam simulans excretus sit. *d*)

a) Licet enim constet, funiculi versus placentam deligationem non necessariam esse, hæmorrhagia tamen ab isto ante perfectum partum vulnerato oriri potest. vid. LA MOTTE *Traité des Accouchemens* L. III. Ch. 8. Obs. 211.

b) OVID. *Amor.* L. II. El. 14.

c) MAURICEAU *Maladies des Femmes grosses* L. I. C. 21.

d) BROOKES *l. c.* p. 107.

§. X.

Uterinæ hæmorrhagiæ, quum adeo causis inter se differant, variis origini mali respondentibus modis tractandæ sunt. Præcipuum tamen & præsentaneum auxilium, prouti aliis sanguinis fluxibus in secta vena est. Quæ quidem, si omnem inde quæ sperari potest opem obtinere velimus, cum grano salis administranda est. Namque in ipso paroxysmo adhiberi non debet, nisi adeo vehemens sit, ut de summa profusione atque de lipothymiis timendum sit. Tum vero in brachio aut salvatella in dorso manus, ceu loco ab utero remotissimo, non vero quod WALLÆO *a*) placet, in pede revellendi scopo pertundatur vena, sanguisque non jugiter sed repetitis vicibus emittatur, & ut bene monet ALLEN, *b*) digito per vices vulnuscule imposito. Ita enim successive sanguis ab utero derivatur, illiusque vasis tempus conceditur, quo se contrahere & claudere sensim orificia sua possint. Certe hac ratione magis proficuas esse experientia edoctus LIEUTAUD *c*) affirmat, & idem ALLENIUS *d*) multas se vidisse asseverat, quæ hoc modo detracto multo sanguine convalescerent, cum nullis aliis remediis reprimi posset fluxus. Atque cum eo consentiunt fere omnes practici. Nam quod ETTMÜLLERUS *e*) venæ sectionem culpat, quia fluxum ve-

B hæmen-

hementiorem reddit, id eo in casu viro largimur, si paroxysmo non adeo vehementi, in eo ipso administretur. Si enim necessitas non urgeat, extra paroxysmum moderandi & diminuendæ plethoræ ergo in usum vocata semper magis profuisse observata est. Si autem jam adeo debilitata sit ægra, ut sine præsentaneo vitæ discrimine nil sanguinis amplius amittere possit, tunc præstat manuum in aqua tepida detentione, (non enim perspicio, cur LIEUTAUD *f*) frigidam suadeat, quæ sanguinem versus interiora repellit,) aut cucurbitulis ficcis ad remotiora loca, ex HIPPOCRATIS *g*) consilio ad mammas, vel monente GALENO *h*) infra illas, aut juxta alios ad hypochondria admotis sanguinem avocare, licet illas prouti & extremorum ligaturas evitare, nescio cur jubeat BROOKES. *i*) Nimum mensium profluvium a venereo contagio ortum inunctionibus mercurialibus feliciter sustulit FITZGERALD. *k*)

a) *Meth. Med.* L. XV. C. 3.

b) *Synops. Med. Pr.* C. XIV. Art. 21.

c) *Synops. univ. Prax. Med.* P. I. p. 454.

d) *loc. cit.*

e) *Opp.* T. I. p. 553. a.

f) *loc. cit.* p. 454.

g) *Sect. V. Aph.* 50. & *Epidem. II.* 6.

h) *Comment. in hunc Aph.*

i) *Gen. Pract. of Physic.* Vol. II. p. 226.

k) *Maladies des femmes.* Paris 1758. p. 69. 70.

§. XI.

Solent & alias excretiones augendo nisum sanguinis ab uterinis vasis avertere. Quod alii laxantibus faciunt, & præcipue quidem laudante ERTMÜLLERO *a*) rhabarbaro, quia adstringente simul virtute pollet. Videntur tamen hæc prouti etiam clysmata, extra paroxysmum potius locum habere, quum in eodem fluxum sanguinis magis adhuc ad affectam partem determinent. Si tamen
spasmi

spasmi adfuerint, in illis demulcendis clysmata egregie se gerunt. Lene laxans adstringentibus fere semper a practicis præmitti FREINDIUS monet. *b)* AILHAUDI vero drastringentem pulverem, panaceam istam si Diis placet, cujus ipse hoc in morbo ad octodecim usque doses exhiberi vult, nemo nisi audax empiricus propinaverit. Vomitoria eo solo in casu, quo SAUVAGES *c)* profuisse vidit, accedentibus nempe nausea & cardialgia, viribus adhuc integris, concesserim, alias enim commovendo corpus sanguinem magis in motum cient. In refractissima tamen dosi ad granum nempe quavis vice Ipecacuanham laudant BROOKES *d)* & LIEUTAUD, *e)* eoque modo etiam adhibitam fuisse puto in illo casu quem FITZGERALD *f)* narrat. Alii malunt ad perspirantia cutis vasa humores allici, atque diaphoreticis fixis, pulveribus & potionibus temperantibus, & similibus utuntur. Quæ quidem lenia diluentia præcipue tunc conducunt, si orgasmus sanguinis moderandus est, in quo casu nitrum, camphora, lene citri acidum, emulsiones in quibus amygdalarum loco avellanas ob majorem vim stypticam recipere solent, julapia, hordeata, levia juscula & gelatinæ egregii effectus sunt: nec hæsitarem MEADIUM *g)* & WERLHOFIUM *h)* sequi, & compescendis his motibus corticem opponere. Fortiora vero sudorifera, roob sambuci, juniperi, aromatica, quæ quibusdam præcipue mulierculis placent, cum sanguinem in majorem adhuc motum cieant, nunquam adhibeantur, de quibus solis FREINDIUM *i)* loqui puto, quando contra ERTMÜLLERUM diaphoreticorum usum improbat, quum sanguinis quam metuit rarefactio & expansio ab his modo fortioribus metuenda sit. Ubi vero nimia sanguinis tenuitas in causa est, incrassantibus utendum est & mucilaginosi, Gummi Arabico, Tragacantha, Ichthyocolla.

a) loc. cit.

b) loc. cit.

- c) *Nosol. meth.* T. III. P. II. p. 56.
- d) *Op. cit.* p. 226.
- e) *l. c.* p. 454.
- f) *Maladies des Femmes.* p. 319. Obs. 1.
- g) *de Imperio Solis & Lun.* C. III. p. m. 73. ed. Götting. 1748.
Tom I. & *Monit. & Præcept. Med.* C. XIX. Sect. II.
- h) *de Febribus* p. 53.
- i) *Emmenol.* p. 132.

§. XII.

Hoc modo si causis probe obviam itum est, adstringentia demum leniora, aut pro re nata fortiora in usum vocari possunt. Corallia præparata, aut eorum tinctura aut syrupus, Granatorum syrupus, syrupus Myrtinus, Diacydonium & alia ex cotoneis malis præparata, Chermes grana, Rosarum rubrarum siccarum conserva, Cascarillæ Extractum, Simarouba, Malicorium, Terra Catechu, Draconis sanguis, Armena bolus, species & confectio de Hyacintho. Succī expressi a plurimis laudantur nec male, ex Plantagine, Bursa Pastoris, Portulaca, Urtica, quorum usus nimis inter nos negligitur; aliis Agrimonia, Bistorta, Tormentilla, quæ tamen ab initio statim data nimis adstringere mihi videtur, Mentha, quæ aquis ipsorum destillatis potentiora erunt, aqua Cinnamomi cydoniata, infusiones & decocta ex Caryophyllatæ radice, Millefolio, Veronica, Pilosella, Symphyto, Pimpinella & quæcunque demum adstringere in Materia Medica docemur, quorum longum indicem Astruc a) recenset, placent. Decocto corticum aurantiorum saturato ad duas circiter tertias redacto Anglos Medicos fere omnes uti reperio, optimumque inde effectum aliquoties ipse vidi. Raræ istius & pretiosæ b) Melitenfis parasiticæ plantæ, Cynomorii coccinei, quod ad fungos olim perperam retulerunt, pulvere, feliciter fluxura

xum femininum cohibuit BAECKIUS c). Martialia præparata, quæ alias menses promovent, hæmorrhagiam si ab obstructione abdominalium viscerum aut uteri vasorum deperdito tono dependet, egregie fissent, in quo casu etiam alia aperientia & visceralia remedia perbelle se habent. Circa Mercurialia, quæ PITCARNIO d) commendantur, "quia aliarum excretionum impedimenta æqualiter tollendo, sicque eas augendo, hanc minuunt," experimenta nobis desunt, quin in pluribus casibus nihil virtutis habitura esse persuasum habemus, præcipue quum attenuando humorum massam, sanguinem ad effluxum magis disponant, & suppressi menses illis revocentur e). Lenia anodyna, quæ profluvia moderari observata sunt, e papavere, f) cynoglossio, liquore anodyno Hoffmanni aut aqua Rabelii propinentur, sed cauta manu, nec Anglos in liberaliori opii exhibitione temere quis in nostris regionibus imitetur Medicus, nec cautelarum immemor sit, quas desideratissimus frater circa propinandum opium proposuit g). An inter nos quoque observatum est, quod BROOKES h) refert, inferioribus visceribus affectis, opium minus in caput agere & hinc instante partu orta hæmorrhagia, largiter exhibitio opio compesci potest? Usneam humani cranii, tanquam nauseosam & invalidam atque ex Helmontianis nugis petitam, Saccharum Saturni & ex illo compositam tincturam antiphtisicam aliaque hujus farinae plena discriminis remedia, utut quibusdam i) laudata, cautus Medicus rejiciat. Neque etiam fortia ista styptica, alumen, hæmatites lapis, HELVETII k) remedium ex alumine & sanguine draconis, licet magno SYDENHAMO Anglisque Medicis quotquot novi usitata, arrident, cum non satis cauti in validiorum adstringentium exhibitione esse possimus, nec nisi summa urgente necessitate ea dare debeamus. Nam præmaturatione aut præpostere adhibita, prouti & opiata insignem malorum Lernam post se ducere solent, mensium suppressio-

pressionem, scirrhum & cancrum uteri, hystericos affectus, fluorem album pertinacissimum, cachexiam, hydropem ^{l)} & icterum, aliaque quibus omnium observatorum paginae refertae scatent. Bene ergo GORTER ^{m)} ex quacunque causa nimis fluunt menses statim secundum inventam causam non omnem sistendum fluxum, sed sensim temperandum, neque effluentem sanguinem cohibendum clausis pudendis esse monet. Nollem tamen etiam cum LIEUTAUDO ⁿ⁾ omnem rem, nisi graviora urgeant symptomata naturae soli committere, & congrua victus ratione tantum fluxui obviam ire, donec febris lenta emergat, aut immineat marasmus, vel se prodant cachexiae hydropisve indicia. Satiус enim est & facilius incipienti malo mederi, quam exhaustis viribus aegræ, quum malum per longam moram invaluit, cum novis quoque morbis primarii mali sequelis luctari. Prudens ergo Medicus, si nullum in mora periculum est, a lenioribus ad potentiora sensim ascendit, ne & nihil agendo naturam deferat, & sine necessitate ancipitem & periculosaи medicinam faciat. Sin autem a sola plethora nimium fluxum oriri constiterit, utique laudanda est methodus, quam in talibus adhibet FITZGERALD, ^{o)} qui praeter venæsectionem nihil nisi tenuem victum & exactissimam diætam praescribit.

a) *Malad. des Femmes* T. II. p. 60. & 85.

b) MORGAGN. *de Sedib. & Caus. Morb.* L. I. Ep. XIV. Art. 25. p. 117. b.

c) LINNÆI *Am. Acad.* Tom. IV. Diss. LXV.

d) *de Fluxu menstruo.* § 28.

e) FREIND *Emmenolog.* p. 148.

f) Opium optimum pra aliis omnibus in uteri hæmorrhagiis extollit inter alios WHYTT *Observations on the Nervous hypochondriac or hysteric disorders.* Edinb. 1765.

g) OBERLIN in *Dissert. de Opio liberius in Medicina adhibendo.* Arg. 1752.

h) *l. c.* p. 226.

i) inter alios ERTMÜLLERO & FREINDIO. *loc. cit.*

k) *Traité*

k) *Traité des pertes de Sang.* Paris, 1697.

l) Id quod de quernis glandibus in specie habet Voërl M. M.
p. 266.

m) *Comp. Med.* II. p. 167.

n) *Op. cit.* p. 452.

o) *Traité des Maladies de Femmes* p. 68.

§. XIII.

Externorum etiam remedium nequaquam contemnendus usus est. Ligaturæ brachiis femoribusque injectæ, ÆGINETÆ a) jam laudatæ, modo non nimis arcte adstringantur, multum in effusioribus præcipue fluxibus valent. Quædam spongiam aceto vinoque rubro aut aliis roborantibus imbutam, vel ranarum sperma cum aceto & alumine plumaceolis exceptum, vel sperniolam Crollii pudoris sinui subjiciunt, aut lintea aceto madefacta b) lumbis imponunt, aut adstringentia emplastra, aut totum corpus linteo aceto forti imbuto obvolvunt. c) Ipso Vitrioli colcothare imbutum tortile linteam vaginæ, quousque potuit, cum successu primus intrusit, in desperato casu FRID. HOFFMANNUS. d) Fomenta ex balaustiorum & rosarum punicearum floribus, lauri foliis & menthæ herba, suffimigia ex odoratis, balsamicis, clysteres uterini, pessi ex calidioribus animalium stercorebus, asinino, canino, suillo, passim laudantur. Sed apage eorum succos expressos ori ingestos. Nec Jaspidi rubræ e) collo appensæ aut aliis amuletis male credulus fidem adhibe. Circa balnea in diversa abeunt auctores, aliis eadem laudantibus, aliis culpantibus. Mihi sese mutuo non intellexisse videntur. In ipso fluxu nemo sanus Medicus illa in usum vocaverit, at extra eundem balneum moderate adstringens uteri roborandi causa adhibitum quid nocere possit non video. Hysterica sympto-
mata

mata quæ sæpe concurrere solent, castoreo, lasere, succini fale, aliisque leniuntur. Hinc & fumigationem è ranis siccatis aut equinis ungulis, quam PASCHALIUS f) proponit, his potius quam ipsi primario morbo conducere crediderim.

a) L. III. C. 62.

b) TISSOT *Avis au Peuple*. II. p. 451. edit. Lyon, 1764.

c) FITZGERALD p. 319. Obs. 2.

d) *Med. Ration. Syst.* T. IV. P. II. Sect. I. C. V. Obs. II. p. 120.

e) BOET. à BOET. L. II. C. 102.

f) *Metb. cur.* L. I. C. 55.

§. XIV.

Omnia hæc remedia utut in spontaneis uteri hæmorrhagiis & lochiorum nimio fluxu efficacia, nihil præstabunt, si in graviditate, abortu, placenta in partu prævia, relicto heterogeneo post partum in utero, fluxus contigerit copiosus. Tunc missis omnibus istis præter partium ligaturas, omnis periclitantis vitæ salus atque spes in periti Embryulci manu posita est, qui lente ac prudenter festinando, juxta obstetriciæ artis præcepta, quæ alibi traduntur, hærentia in utero ipsiusque hæmorrhagiam causantia, corpora quantocyus educat, licet ne sic quidem semper servari mulieris vita possit. Ne vero ægrota inter operandum viribus deficiat, blandis cardiacis atque analeptics, nequaquam vero calidioribus, refocillanda est, atque tum demum, ubi ejecta ex utero sunt, quæ præter naturam ibi hærebant, supradicta remedia in usum trahenda sunt.

§. XV.

Regimen vitæ exactissimum talibus sanguinis profluvii laborantibus observandum est. Nimis calidus aër
denuo

denuo sanguinem in motum ciendo & rarefaciendo, curationi multum obest, frigus autem corporis superficiem stringens sanguinem ab exterioribus arcet, & versus uterum determinat. In cibo dando ceu graviter vulneratæ tractandæ sunt ægræ, & hinc pro re nata tenuissimus & parcissimus porrigendus est, ne nova plethora generetur, neque etiam ob dejectum plane ventriculi robur, quod semper hunc morbum comitatur, multum appetunt. Ratio tamen habenda est virium in iis, quæ enormibus profluviiis plane exhaustæ sunt, ut pedetentim iterum omnium partium & præcipue ventriculi labefactatus valde tonus lenibus visceralibus roborantibus firmetur. Potus exhibendus temperans atque copiosus, sed semper medicatus, leniter roborans, qualem omnes aquæ minerales leviter martiales nobis præbent, quibus aliquid vini rubri austeri addi potest. Earum vero quæ spirituosius potibus indulgent cura nulla est. Reliquarum excretionum provida cura habeatur, ut rite procedant, ne turbatæ in utero sibi exitum quærant. Quies corporis imperetur sedulo, quæ fere sola hæmorrhagiæ minoris impetum sæpius compescuisse observata est. Et si cum FREINDIO *a)* erectum humani corporis situm inter causas ponimus, cur femininus sexus menstruam purgationem patiat, situm quoque horizontalem ad moderandum istum fluxum servandum esse facile patet. Sed & mente tranquilla sit, caveatque sibi præcipue ab ira atque terrore, quibus non alia magis incurabiles hæmorrhagias producant. Unica enim ROLFINCII *b)* observatio, qua femina, cui per duos menses sanguis fluxerat, terrorem profuisse affirmat, generali regulæ nil obest: nam licet terror ut plurimum per breve tempus fluxum sistat, multo atrocius tamen eundem paulo post recrudescere facit. Eadem vitæ ratio, quam facillime morbus hic recidivas experiatur, postea continetur præservandi scopo, interpositis passim lenibus la-

xantibus, c) & ut plethora præcaveatur, venæsectionibus debito temporei nstitutis.

a) *Emmenol.* p. 77.

b) *Med. Comment.* L. IX. S. VI.

c) Nam hæmorrhagia quælibet immodica, nisi quamprimum sedata fuerit, leniens purgatio administretur, ne recidivam patiatur metuendum est. SYDENHAM *Febr. cont.* A. 1661. p. 42.

§. XVI.

HIPPOCRATIS a) effatum est: "quando menses copiosiores prodeunt, morbi contingunt." Quod verum esse non in mensibus modo, sed omnibus uteri nimis hæmorrhagiis dolendum est. Quibus enim nimium catamenia fluere solent, iis vasa uterina valde debilia esse significatur, hinc facillime vel abortiunt, vel plane steriles b) fiunt, & quibus ætate provectis nimia menstruatio supervenit, eas hæmorrhagia hæc plerumque incurabilis ad mortem usque comitatur, aut ulcus cancerumve uteri infert c). Illæ vero quæ in partu graves hæmorrhagias patiuntur, lipothymiis & convulsionibus, quæ fere semper funesti exitus in hoc affectu indicia sunt, periclitantur, & si etiam evadunt, per reliquum vitæ tempus valetudinariæ manent, & vel hydropicæ vel hæcticæ moriuntur.

a) *Secl. V. Aph.* 57.

b) An ergo, quod LIEUTAUD l. c. p. 453. asseverat, mulieres post insolitam uteri hæmorrhagiam fecundiores fieri, adeo generaliter pronunciandum erat?

c) LIEUTAUD l. c. p. 452.

